



Questa stad ein ils stabiliments sanai dall'Alp Ranasca dado vegni inaugurai cun ina gronda fiasta populara.



Era ils stabiliments d'alp da Ranasca dadens basegnan urgentamein ina remedura.

FOTOS MAD

# Domat ha concediu credit per las tegias da Ranasca

Ils representants dalla Partida burgheis-democratica han procurau per ina sorpresa ella davosa sesida dil parlament communal

DA CLAUDIO WILLI / MC

■ **La sesida dil parlament communal da Domat da gliendisgis vargau ha entschiet cun ina veritabla sorpresa: Il parsura dil cussegl da vischnaunca, Daniel Meyer (pps), ha prelegiu ina declaronza dil parlamentari communal Franco M. Thalman e dil suprastont Georg Ragaz.** Da quella resorta che *Georg Ragaz* e *Franco M. Thalman* han bandunau la Partida burgheis-democratica (pbd). Sco quei ch'els declaran en lur scriber drizzaus al cussegl da vischnaunca ed alla suprastontza communal veglien els a s'engaschar vinavon per ina ferma politica burgheisa, denton buc el ravugl dalla pbd. Ragaz ei staus in representant prominent dalla pbd, ha fundau il schaner 2013 la Partida burgheis-democratica dil circuit dil Plaun sco successura dalla Partida burgheis-democratica dil cumin da Trin. El ei s'engaschaus da camifo per quella partida ed ad el eis ei

reussiu da menar quella per l'emprema gada al success enteifer il cumin da Razén cu el ei vegnius eligius 2016 sco emprem commember dalla pbd ella suprastontza communal da Domat. La decisiun seigi semadirada en discussiun cun Thalman ch'ei vegnius eligius il november 2016 sco emprem commember dalla pbd el cussegl da vischnaunca. Tenor Ragaz ei quei pass staus tut auter ch'ina decisiun spontana, mobein il resultat d'in liung process.

## Alp Ranasca el focus

Tier las fatschentas realas ha il parlament communal giu da s'occupar da dus credits retroactivs. Igl emprem credit concerna la tegia d'alp da Ranasca dadens. Igl uost d'uonn ei la tegia d'alp da Ranasca dado vegnida inaugurada festivamente suenter ina renovaziun. (La Quotidiana ha giu rapportau surlunder.) Usa setracta ei gia puspei da sefatschentat cun ils stabiliments d'alp da Ranasca da-

dens ch'eran vegni suttamess per igl onn 2014 ad ina vasta sanaziun. El decuors dil temps ei denton semussau che la deflussiun dil stabiliment amiez funcziunava buca pli, che la cuvrida dil tetg era plein ruina e che l'aua veva caschnau donns. Igl entir tetg da stuors stoppi vegnir remplazzaus urgentamein per prevegnir ad ulteriurs donns. Ton la suprastontza communal sco il cussegl da burgheis hagian decidiu da sbursar il credit da sanaziun corrispuondent ord il conto d'acquist da terren, pia senza daners da taglia directs. Quei che pertucca l'economisaziun dall'Alp Ranasca ha il president communal *Erich Kohler* puntuau che l'alp sappi vegnir nezegiada da tut temps dils purs da Domat. El ei era sedeclaus promts d'interpreter aunc ina gada ensemen cun in moderatur l'emprova da possibilitar als purs da Domat d'affittar l'Alp Ranasca dado cun in agen ugau d'alp e tenor lur reglas. Igl ulterior proceder per ina perioda da test

duei vegnir discutada proximamein ensemen culs pertuccai.

## Tegia da skis Term Bel

*Silvia Bisculm Jörg* (ps) ha dilucidau la proposta dalla suprastontza communal da contribuir la summa da 110 000 francs sco contribuziun dalla vischnaunca politica alla sanaziun dalla tegia da skis Term Bel sill'Alp Urtgicla che vegn a custar rondund 220 000 francs. La tegia construida igl onn 1945 survescha als commembers dil club ed a biars vischins e vischinas da Domat sco dormitori, liug da sentupada e da paus d'excursiuns da viandar n'aturas da skis e mountainbike. La vischnaunca burgheisa ha giu concediu ina contribuziun da 65 000 francs per quei intent. *Philipp Ruckstuhl* (pcd), sez dapi biars onns guardia-camona, ha puntuau ch'ei vegni era prestau dabia lavur cumina en favur dalla tegia. La sanaziun planisada muntii era ina contribuziun persistenta per migliurar la qualitat da quei

liug da sentupada appreziau. Tut las fracziuns ein s'exprimidas el senn dalla proposta dalla suprastontza communal da sustener la sanaziun dalla tegia da skis Term Bel sco purschida attractiva dil temps liber. «Recuvrada activa ella natira» seigi impurtont, ha *Anita Müller Cafilisch* (ps) declarau denter auter e la contribuziun ei vegnida concedida unanimamein.

Il cussegl ha era tractau in diember interenziuns persunalas. Discutada aspramein ei l'ordinaziun davart il diever dallas localitads publicas vegnida. Il gerau *Armin Tanner* (pcd) ha informau davart la nova illuminaziun da Nadal previda e dil fatg che la biodiversitad duei vegnir promovida sigl intsches dalla vischnaunca da Domat. La gronda part dils interpellants ei stada cuntenza cun las rispostas dalla suprastontza communal e las interenziuns ein lu era vegnidadas surdadas praticamein senza cuntervuschs per liquidaziun alla suprastontza communal.

# Ils campionadis sco sfida

Melina Baumann ha finiu igl emprendissadi cun oreifer success

DA GIUSEP VENZIN / ANR

■ **La variaziun da sia professiun ha plaschiu a Melina Baumann el temps d'emprendissadi sco specialista dall'economia da casa. Igl emprendissadi ha ella fatg a Trun ella Casa Depuoz. «Il liug d'emprendissadi ei staus mega cols», conceda la giuvna da Favugn.** Ella menziunescha il contact culs cussadents. Quels contacts hagian dau anim ils treis onns d'emprendissadi. La nota 5,7 ch'ella ha schau scriver a siu examen ei stada la megliera da siu rom ed ina dallas pli aultas dils emprendists da tuttas professiuns. Malgrad l'excellenta nota ei la giuvna diligenta aunc alla tscherca d'ina plazza da lavur. «El Grischun datti paucas plazzas da specialista dall'economia da casa», ha *Melina Baumann* detg. Igl excellent examen motivescha da separitar als campionadis da professiun. «Jeu gaudel quell'experience e sai mo gudignar.»

## Lavur varionta

«La lavur dalla specialista dall'economia da casa ei da paregliar culla lavur dalla specialista d'hotel», ha *Melina* declarau siu engaschi. Duront igl emprendissadi hagi ella luvrau en cuschna, el servis, hagi schubergiau e lavau resti – hagi exequiu tuttas lavurs che sedettien el menaschi da casa d'instituziun sco la Casa Depuoz. Culla populaziun da Trun hagi ella giu pauc contact, deplurescha *Melina*: «La Casa Depuoz ei empau ord il vitg

ed aschia sedat quei buc.» Cun spassegiar, cun sport da fitness e cul cant eis ella sefatschentada el temps liber. «Il cantar ei ina veglia pissiun. Jeu hai era cantau en

in chor.» Pil mument conta ella persula, oravontut canzuns da pop. «Quei caschna muments da ventira e libereschamei da stress.»



Melina Baumann da Favugn ha absolvii igl emprendissadi da specialista dall'economia da casa alla Casa Depuoz e finiu quel culla nota 5,7.

FOTO G. VENZIN



Franco Tuor ha terminau igl emprendissadi da stagner culla megliera nota dils emprendists grischuns da sia professiun.

FOTO G. VENZIN

# Tetgs e canals

DA GIUSEP VENZIN / ANR

■ **Stagner era buca la professiun garegiada da Franco Tuor. «Jeu havess bugen fatg enzatgei cun autos.»** Il bab ha viliu occupar siu fegl il temps da stad ed ha procurau per ina lavur el luvratori da stagner da *Guido Brot* a Schluain. «Jeu havevel la tgagia», ha *Franco Tuor* detg a caschun dall'intervista. Inaga alla lavur ei quei spert semidau. «Jeu sun staus fascinatus.» Quella fascinaziun ha cuzzau igl entir emprendissadi. Quel ha il giuven da Glion finiu cun l'excellenta nota 5,4 – cun la megliera nota dils emprendists grischuns da stagner.

## «Ins vesa tgei ch'ins ha fatg»

Sco laic hai jeu dumandau: «Tgei fa il stagner?» Franco: «Il stagner fa tetgs da stuors, montescha las canals dil tetg, montescha ils sculs, las garnituras dil tgamin ed auter. El producescha era differenta tocca per la montascha.» Il pli bu-

gen hagi el fatg tetgs da stuors: «Ti vas sin tetg, dattas in di brutal gas e vesas la sera tgei che ti has ha prestau.» Quei numna Franco in dils puncts culminants da sia lavur.

Cugl excellent emprendissadi ha Franco aviert las portas al success professiunal. El hagi differentas opziuns per secolar vinavon, il mument vegli el denton luvrar e fadgiar in temps. Il mars suonda la scola da recrut. «E lu sai jeu mirar co ei va vinavon.» Duront la scola da recrut fa el il «bigliet» da camiu. «Forsa plai quei a mi», ha Franco detg ed aschuntau dubitond: «Il mument forsa buc, la lavur da stagner plai fetg bein.»

## Plascher digl auto

Ir cun skis e trenament da fitness numna Franco duas activitads dil temps liber. Sia pissiun s'auda denton agl auto. Il possessur d'in Audi S3 zambregia bugen vid siu auto e nezegia sias habilitads sco stagner per dar a quel in outfit cool.